

sejo. Se debano cazar ne le cause de' nobel nostri, come se fano ne le Quarantie; redurse debino do volte al zorno, zoè damatina et da poi disnar se 'l non sarà Pregadi; et non se reducendo, cadino a la pena di ducato uno per volta, di qual siano mandati debitori a Palazzo per il nodaro nostro, che li atenderà soto pena de' privation dil suo officio, et siano scosse per l'officio di l'Arsenal, nè possino esser depenati salvo per i tre quarti di le balote dil Colegio nostro. Et acciò che li trivisani et altri forestieri non sia qui su la spesa; li qual però non sono molti, li prefati 25 nobil nostri debino prima far imbosolar tutti li ditti trivisani et altri da poi se sarano dati in nota in termine di zorni 10, et cavarli fuora per ventura; et secondo sarano cavati et scriti sopra un foglio, cussì siano alditì et giudicati et non altramente, sotto debito di sacramento, contra contradiction sempre di dui intervenienti per la comunità, territorio et castelle dil trivisan, quali intervenienti debino usar ogni diligentia per favor di le cose di la dita comunità et castelle, et territorio. Expedite veramente le cause di trivisani et altri forestieri, siano subito imbosolati tutti li nobel et cittadini nostri che pretendeno esser exempti, et cavati per ventura fuora siano expediti ad un, *ut supra*, con la contradiction supradita. Servar se debbi la parte de le pregerie, da esser dato el juramento ogni fiata che judicarano. Et acciò che li ditti XXV sapino expedir le dite exemption, sia preso che le justification di le ditte exemption siano tolte come per questo Consejo fu deliberato a di 29 Zugno 1518, che fusseno tolte quelle de padoana.

† De parte . . . 125
De non . . . 35
Non sinceri . . 0

164*

Die 27 Mai, in Rogatis.

Sapientes Consilii, Sapientes Terræ firmæ.

Vedendosi, per experientia, che li XXV nobil nostri electi dil corpo di questo Consejo interdici de le exemption che pretendeno trivisani, per esser troppo numero a redursi, aldariano con gran longeza ditte exemptione, però, per darli presta expeditione, l'anderà parte, che 'l Colegio nostro dil numero de li ditti XXV ne debbi elezer a bosoli et balote XV, quali soto le medeme pene contenute in la parte ultimamente presa in questa materia, et con quelli modi, se debano redur una volta al giorno et da poi

disnar, et aldir le ditte exemptione et quelle judicar; nè possino far sententia o juditio alcuno, benchè fusseno reduti manco di XV, se non con balote diexe de una opinion. Et acciò che 'l judicio de exemption passi *uniformiter* et non se fazi una judicatura per una man et una altra per altri judici, che mete in confusion le cose nostre, però sia preso che li ditti XV debano *etiam* aldir tutti quelli padroni, quali se appellano di le sententie fate a Padoa per i Provedadori nostri supra le stime, et questo due volte a la settimana; et *similiter*, cadaun, si nobil et citadin de questa nostra città come cadaun altro del territorio padoan et de Padoa che pretendesse exemption et non fusse stà aldito, et quelle expediscano con il sopradito numero di balote. *Præterea*, possano *etiam* aldir li oratori di Padoa et territorio che si dolesseno di le sententie fate per i X Savii nostri et per i Provedadori di estimi di Padoa, et quelle laudar et taiar con el dito numero di le 10 ballote, *ut supra*.

† De parte . . . 144
De non . . . 25
Non sincere . . 0

Die 18 Augusti, in Rogatis.

Sapientes Consilii, Sapientes Terræ firmæ.

Fu ne li mexi passati ordinato, per questo Consejo che li XV, judici deputati ad aldir le exemption de' trivisani et padoani, dovesseno esser X de una opinion ne le sententie che farano; et però, el non potersi redur sempre li ditti XV fa che non se dà expeditione a causa alcuna, che è con non vulgar danno de li danari di la Signoria nostra, che non scuode le colte et daie; et però, acciò che 'l sia regulà nel dito articulo de ballote,

L'anderà parte, che per auctorità di questo Consejo sia statuido che li ditti XV judici possino redursi XII de loro, et per do terzi de le ballote possino judicar le ditte exemptione, come è ordinato ne le altre parte.

† De parte . . . 178
De non . . . 6
Non sincere . . 0